

## Confidenza in sai stess, curaschi e libertà d'agir

Discuors al podium «Spiert d'intrapraisa e turissem» cun Kurt Baumgartner e Magdalena Martullo

■ (cp) Els toccan tuots duos pro'ls impressaris ils plü cuntshaints e cul plü grond success in Grischun. *Magdalena Martullo e Kurt Baumgartner* d'eiran dal medem avis al podium davart «spiert d'intrapraisa e turissem»: Per ün success a lunga dürada douvra dad üna vart ideas innovativas ill'hotellaria e da tschella vart eir il spazi da libertà necessari per s-chaffir novs progets. Passa 50 persunas han persegüit il discuors al podium captivant a Scuol.

Magdalena Martullo es cuntshainta sco impressaria industrialia innovativa, sco la plü gronda datura da lavur i'l chantun e sco cusglia naziunala, Kurt Baumgartner sco impressari d'hotel da l'on 2018 cun grond success. Quist duo fich qualifichà s'ha inscuntrà als 1. oktober per ün discuors al podium davart il tema «Spiert d'interpraisa e turissem» a Scuol. La sairada moderada da *Reto Mayer* ha tut in mira las pussibilitats chi sun avertas ad interpraissas innovativas i'l turissem e'ls obstaculs ch'els han da sur-

vendscher in Grischun.

Ils ultims ons sun stats difficils pell'hotellaria in Grischun ed in Engiadina. Chavazzins sun l'euro debel, il chal dals numers da visitadurs, marschas chi sbassan, invierns cun paca naiv e la concorrenza plü bunmarchada our d'pajais. Amenduos partecipants al discuors han deplorà ils process plans cun dar permess e las prescripziuns da fabrica bler massa cumplichadas chi fan la vita düra ad intrapraisas innovativas cun novas ideas. Cusglia naziunala Martullo s'ingascha a Berna per simplificaziuns ed excepziuns per regiuns muntagnardas ed interpraissas mezdanas e pitschnas. L'allianza schneistra-verda chi navighescha suot la «müdada dal clima» lascha spettar pels prossems ons ulteriuras difficultats. Implü ha ella pledà per daplü cooperaziuns tanter ils differents acturs. «I dà blers buns exampels», ha ella manià. Impustüt in regiuns periferas sco in Engiadina ed in Val Müstair esa specialmaing important cha l'agricultura e'l turissem

collavureschan e chi nu's laschan frizzar sü ün cunter tschel.

Baumgartner ha intunà cha la branschja saja dependenta dad infrastrukturas bunas e rendavlas. Cha quai sajan pelplü pendicularas da grondezza mezdana ed a Scuol implü il «Bogn Engiadina». Cun quai s-chaffischan las destinaziuns üna occupaziun da basa cun giasts, quai chi vain bun eir a la mansteranza ed a tuot ils abitants da la Val.

Tuots duos partecipants al discuors saintan però actualmaing «ün pain spiert d'iniziativa» in Engiadina ed in tuot il Grischun. A la fin dals quints dependa il success però suvent da persunas singulas chi sun innovativas, chi vegnan cun ideas novas e chi han il «bler flà». Cha nus in Svizra hajan oramai predschs ots e stopchan furnir ota qualità, ha mannià Martullo. «I dà bleras bunas iniziativas i'l turissem grischun!», ha ella affirmà cun optimissem. Be chi's stuvess rapportar da daplüssas chosas positivas per cha eir impressaris giuvens crajan al success.



Kurt Baumgartner e Magdalena Martullo.

MAD